

**Rohingya tiada kaitan dengan militan, kata aktivis
Free Malaysia Today
Dec 4, 2016**

Presiden persatuan Rohingya di Thailand berkata, berita mengaitkan etnik itu dengan gerakan militan adalah rekaan semata-mata untuk mendapatkan simpati serantau dan antarabangsa.

BANGKOK: Masyarakat antarabangsa diingatkan supaya tidak mempercayai tuduhan tidak berasas kerajaan Myanmar masyarakat Rohingya yang menjadi mangsa kezaliman, mempunyai hubungan dengan pertubuhan militan.

Presiden Persatuan Rohingya Burma di Thailand, Maung Kyaw Nu berkata tuduhan Yangon terdapat kaitan antara Rohingya dengan gerakan militan adalah suatu rekaan semata-mata dengan tujuan utamanya untuk mendapatkan simpati serantau dan antarabangsa.

“Ini (tuduhan Myanmar) semua direka kerajaan, kenyataan yang dicipta untuk mengalih perhatian dan mewajarkan pasukan tenteranya bertindak ganas terhadap Rohingya (di wilayah Rakhine),” katanya di sini, baru-baru ini.

Aktivis, yang kini tinggal dalam buangan di Thailand, mendakwa tuduhan Yangon itu adalah sebuah cerita lama yang dikitar semula pihak tentera Myanmar pada 1990-an dan digunakan semula pentadbiran awam pimpinan Aung San Suu Kyi sekarang.

“Masyarakat antarabangsa dan serantau tidak seharusnya mempercayai cerita palsu kerajaan itu ketika kekejaman terhadap Rohingya, terutama di Rakhine, terus berlaku dengan berleluasa, walaupun terdapat tekanan daripada masyarakat antarabangsa,” kata Kyaw Nu.

Kerajaan Myanmar, melalui jurucakapnya mendakwa pertubuhan militan berasaskan Rohingya yang mempunyai hubungan dengan luar negara, menyerang pos kawalan sempadannya dan membunuh banyak anggota keselamatan.

Yangon menjadikan serangan terhadap Pengawal Sempadan pada 9 Okt sebagai alasan untuk menghantar beribu-ribu anggota tentera ke Rakhine bagi memulakan kempen melanggar hak asasi manusia masyarakat Rohingya.

Keganasan berterusan di Rakhine memaksa beribu-ribu anggota masyarakat itu melarikan diri ke sempadan Bangladesh untuk menyelamatkan diri.

Myanmar, yang diterajui parti pimpinan Suu Kyi, yang mendapat kemenangan besar dalam pilihan raya umum bersejarah negara itu tahun ini, dikritik hebat Pertubuhan Bangsa Bersatu (PBB) dan kumpulan hak asasi manusia.

Menurut Kyaw Nu, serangan terhadap pengawal sempadan yang dimaksudkan kerajaan Myanmar itu sebenarnya dilakukan individu Rohingya biasa, yang tidak tahan lagi dengan kekejaman dan ketidakadilan yang dilakukan anggota tentera dan pasukan keselamatan negara itu sejak sekian lama.

“Ia merupakan reaksi spontan penduduk tempatan terhadap kekejaman dan penindasan hak asasi manusia yang mereka alami di tangan pasukan tentera kerajaan sejak beberapa generasi lepas,” katanya.

Beliau berkata beberapa hari sebelum berlaku serangan terhadap pos pengawal sempadan itu, anggota tentera melakukan keganasan dengan sewenang-wenangnya di beberapa kampung berhampiran, memukul dan menangkap penduduk, di samping terdapat tuduhan mereka merogol dan melakukan peras ugut.

“Mungkin, itulah yang mencetuskan serangan (terhadap pengawal sempadan),” katanya.

Menurut aktivis itu, strategi penciptaan naratif palsu oleh tentera Myanmar mengenai kaitan antara masyarakat Rohingya dengan pertubuhan militan, juga digunakan untuk mendapatkan sokongan penduduk tempatan.

Katanya, tentera ingin memberi gambaran walaupun Myanmar “sedang diserang” kumpulan militan, mereka tetap kekal sebagai pasukan kukuh dalam menjaga hal ehwal politik Myanmar, walaupun menyerahkan kuasa kepada orang awam melalui pilihan raya umum.

Copyright (C) 2009-2016 MToday News Sdn. Bhd. All Rights Reserved.

Source: <http://www.freemalaysiatoday.com/category/bahasa/2016/12/04/rohingya-tiada-kaitan-dengan-militan-kata-aktivis/>